

Da la Finlanda al Portugal

Passa sis decennis da pasch

DA GUIU SOBIELA-CAANITZ

■ **Ils 22 da fanadur 2011, ad Oslo e sin l'insla d'Utøya, ha Anders Behring Breivik, terrorist norvegiats da la dretga extrema, mazzà da sang fraid 77 umans e ferì 151. Durant ses process ha'l sa definì sez «il chavalier il pli perfetg da l'Europa dapi la Segunda guerra mundiala».** Lez snuavel malfatg, l'ideologia criminala da l'assassin, sia tenuta provocanta e senza ricla, ses displaschair da n'avair betg pudì mazzar anc dapli glied, tut quai ha scurlattà il pievel norvegiats pli che tut quai ch'el aveva fatg atras dapi l'invasiun tudestga da 1940. «Der Spiegel» dals 20 da fanadur 2012, in onn pli tard, scriva: «La Norvegia ha fatg impressiun a blers umans, pervi da sia moda e maniera digna d'esser en cordoli, da sia clera attaschadad a la democrazia, e perquai ch'il pajais ha supportà il process cunter Breivik (...). Retschertgas novas mussan che la fiduzia en la democrazia saja creschida dapi l'onn passà.» L'instituziun norvegiatsa la pli famusa è bain «Den Norske Fredspris»: Il Comité Nobel norvegiats, tenor il testament da l'industrial svedais Alfred Nobel (1833–1896), cumpiglia «tschintg persunas elegidas dal parlament norvegiats» e duai assegnar mintg'onn il Premi Nobel da la pasch a «tgi che haja fatg dapli per la fraternisaziun dals pievels, l'aboliziun u la reduenziun d'armadas, sco era per conferenzas da pasch». Parsura dal comité è dapi 2009 il socialdemocrat Torbjørn Jagdland, secretari general dal Cussegl

da l'Europa; era tschellas quatter persunalitads dal comité represchentan partidas parlamentaras norvegiatsas. Quest onn para il comité, en cuntrast marcant cun ils malfatgs da Breivik, d'avair vulì far palais co ch'ins possia promover la pasch en Europa: Ils 12 d'october ha'l assegnà il Premi Nobel da la pasch a l'Uniu europeica (UE). I vala la paina da leger la motivaziun dal comité.

Trais guerras en ina perioda da settanta onns

«L'UE e las organisaziuns predecessuras han gidà durant passa sis decennis a promover la pasch e la conciliaziun, la democrazia ed ils dretgs umans en Europa. Tranter las guerras mundialas ha il comité assegnà plis premis a persunas che pruvavan da conciliar Germania e Frantscha. Dapi 1945 ha quella conciliaziun sa realisada. Las snuavlas suffrientschas da la Segunda guerra mundiala han cumprovà ch'ins basegnava in'Europa nova. Lez dus pajais han fatg trais guerras en ina perioda da settanta onns.» Il comité fa pia allusiun er a la guerra che la Frantscha ha declerà 1870 a la Prussia ed als stadis tudestgs aliads e ch'il nov imperi tudestg ha gudagnà 1871. Perencunter: «Oz fiss ina guerra tranter Germania e Frantscha nunpussavla (...). En ils onns organta èn la Grezia, la Spagna ed il Portugal vegnids commembers; l'introduenziun da la democrazia era ina cundiziun da lur adesiun. La crudada dal mir da Berlin ha pussibilità l'adesiun da plis pajais da l'Europa centrala ed orientala (...). Quai ha rinforzà la democrazia e gidà a metter fin a blers conflicts etnics.»

Tals datti anc adina tranter commembers da l'UE, ma ina guerra, per exempel tranter la Rumenia e l'Ungaria, na fiss oz pli pussavla. Ins po anc far endament la pasch cuntanschida en l'Irlanda dal nord. Ins ha reproschà al comité da tashentar las guerras balcanicas dals onns novanta; ma lezza giada n'eran ils pajais cumpigliads betg commembers da l'UE e gnanca candidats. Il comité fa dal rest endament: «L'adesiun da Croazia l'on che vegn, las novas tractativas d'adesiun cun il Montenegro (...) tut quai rinforza il process da conciliaziun tranter ils pajais balcanics (...). L'UE fa atras ina greva crisa economica e ina considerabla agitatiun sociala. Il Comité Nobel norvegiats vul far attent a quai ch'el resguarda sco la prestaziun principala da l'UE: Ses success en il cumbat per pasch e conciliaziun, per democrazia e dretgs umans. La stabilisaziun cuntanschida da l'UE ha gidà a transfurmar ina gronda part da l'Europa, continent da guerra vegnì continent da pasch. La lavur da l'UE munta 'fraternisaziun dals pievels' ed ina furma da las 'conferenzas da pasch' menziunadas d'Alfred Nobel en ses testament sco criteris per il Premi da la pasch.»

Incendiariis datti anc adina

Cun lur motivaziun han las trais cumissarias ed ils dus cumissaris d'Oslo elavurà ina survista istorica fitg curta, ma objectiva e vardavla dals davos 150 onns en Europa. Sch'ins sa restrenscha als davos 70 onns, ston ins mo prubar d'elavurar ina glista da quellas citads grondas da l'UE actuala nua che las ruinas domivan l'on 1945; senza ils decennis da

pasch n'avess ins betg pudì prestar ina tala lavur da reconstrucziun. Gia ils 4 d'october 2012 ha l'antier secretari da stadi Franz Blankart declerà a l'Universitad da Losanna en in'occurrenza da la Fondaziun Jean Monnet: «L'UE, basada sin ils dramas da duas guerras mundialas, han ins concepì sco in plan da pasch. Sco tal ha la sa verifitgada.» Quai ha confermà cuss. dals stadis Urs Schwaller a Lucerna ils 27 d'october 2012 tar in act festiv da la pcd: «Grazia a l'UE regi la pasch dapi varga 60 onns» (v. La Quotidiana dals 29, p. 13). La survista dal Comité norvegiats Nobel è tant pli objectiva che la Norvegia na fa betg part da l'UE. Lez pajais da strusch 5 milliuns olmas n'ha nagin conflict cun nagin auter pajais, ma resguarda sco pli prudent da restar commember da l'Alleanza atlantica (NATO): La Norvegia ha tuttina in cunfin cuminaivel da 167 km cun la Russia (142 milliuns olmas). En «L'Hebdo» (Losanna) dals 18 d'october 2012 (p. 27) scriva Chantal Tauxe, «rédactrice en chef adjointe»: «Cur ch'ins ha annunzià che l'UE survegnia il Premi Nobel, hai dà sarcasems avunda. Lez eran profundament maltschecs per tgi che resguarda l'istorgia a lunga vista. En Svizra, sco dal rest en blers pajais da l'UE, han ins embridà tge che las guerras muntavan: Mazzacras quasi per mintga generaziun, milliuns morts u invalids, (...) ina sort smaladicziun (...). In manader dal cumbat senza pausa per salvar la zona euro valitescha meglier l'ierta da pasch che l'UE ha bajegià: Jean-Claude Juncker, Luxemburgais, perquai che la Germania nazista aveva recrutà ses bab

sfurzadamain en l'armada.» Gea, quai han fatg tras nundumbraivels giuvens luxemburgais, alsazians, lorenais, beltgs d'Eupen, Malmedy e St. Vith annectads illegalmain da la pussanza occupanta. L'Uniu sovietica ha fatg gist il medem en Estonia, Lettonia, Lituania e Pologna da l'ost, annectadas arbitramain 1939 e 1940. Gia 1914 aveva la Frantscha violà la neutralitad da la Savoia dal nord, francada internaziunalmain 1815, cun recrutar la giuventetgna da la regiun per la guerra cunter la Germania. En il medem «L'Hebdo» (p. 57) fa Jacques Pilet allusiun al president serb Tomislav Nikolic: Lez ha declerà «che la mazzacra da passa 7000 Bosniacs a Srebrenica na saja betg stada in genocid – schebain che la Curt penala internaziunala per l'antieriua Jugoslavia ha constatà che gist quai saja stà il cas»*. Pilet: «La guerra sa prepara anc adina en la Peninsla balcanica: In ami da l'incendiari criminal Milosevic è a la pussanza en Serbia (...). Senza las scuntradas, ils stgomis e las reglas da giu en la 'chasa cuminaivla' na savess ins betg co che las vischinanzas tranter Tudestgs, Franzos, Polacs ed auters inimis d'ier sa sviluppassan. Crair che la pasch saja francada per la perpetnadad (...) e far beffas da tgi che lavura per la mantegnair, quai è tup e ristgà.» L'UE ha manà la pasch da la Finlanda al Portugal e la maina forsà anc da la Croazia a la Cipra, ma ins duai vinavant la tgirar e la proteger.

*Der neue Fischer Weltalmanach 2013. Frankfurt am Main (Fischer Taschenbuch Verlag, ISBN 978-3-596-72013-5) 2013, p. 416, chavazzin «Serbien».